

Vorrede.

einig vnd allein verbleibe. So hab ich / in betrachtung dessen allen / sonderlichen aber auch / dasz ich mit dieser Occupation (als darauff allzeit etwas guts zu erlernen vnd zubehalten) auffz wenigst meine vbrige zeit nutzlich vnd wol anlegen / vnd vertreiben werde / obgemeldtem E. S. G. Buchtruckern / vnd angeregten meinen guten Freunden / in ihrem begeren vnd antreiben zu willfahren / mich endtlich vermögen / darauff das Werck in Gottes Namen für die Hand genommen / auch nach vollendung desselben / es vnder die Press legen / vnd in gegenwertigen Truck kommen lassen.

Vnd demnach diese meine Version vielleicht weniger nicht / als das Italiänische Exemplar selbst / des Machiauellj Gegentheilen / vnd den Zoilis (die viel mehr einem andern sein gutmeinen des Vorhaben zu tadeln / als etwas nutzliches zufertigen in Gewonheit) vnderworffen / vnd solchen nach eines solchen Patronen vnd Schürmherren / der selbige wider solche Leuth verthädige vnd vertrette / vonnöthen sein wirdt.

Also hab ich mich vmb so viel beherzigen / vnd E. S. G. als einem hocherleuchten vnd sollichem Fürsten / der so wol vber gedachtes Machiauelij Politische schriften / als auch dieses sein Kriegsbüchlin / mehr hochvernünfftiglich wirdt iudicirn
vnd